



Astudiaeth Achos Catrin Roberts

Mae gan Catrin Roberts ei chwmni cyfieithu ei hun yng Ngogledd Cymru ac mae hi wedi bod yn dilyn cyrsiau Cyfieithu Ôl-radd TILT yn ddiweddar (2 Fodiwl sy'n 30 Credyd yr un). Dyma hi'n sôn sut mae TILT wedi bod o fudd iddi hi.

A allwch chi roi amlinelliad byr o faes arbenigedd eich cwmni (neu'ch gwaith ar eich liwt eich hun?)

Cofrestrais fy hun yn hunan-gyflogedig, a dechreuais drwy gyfieithu taith gerdded leol gydag elfen hanesyddol ar gyfer ap daeryddol. Ers hynny rydw i wedi cyfieithu sawl taith arall, gan gynnwys teithiau o amgylch Portmeirion, Llanidloes a Nant Gwrtheyrn (ac wedi dysgu llawer am hanes y llefydd yma yr un ffordd!)

Sut berthynas oedd gennych â'r byd dysgu cyn dilyn y cwrs, ac a yw'r berthynas wedi newid wedyn?

Bues i'n astudio tuag at radd BA mewn Iaith a Llenyddiaeth Gymraeg yma ym Mhrifysgol Bangor rhwng 2005-2008, ond ers hynny rhaid cyfaddef nad oeddwn i wedi gwneud unrhyw waith academaidd o gwbl, felly roeddwn i allan o bractis braidd (roedd rhaid i mi atgoffa fy hun sut i ysgrifennu troed-nodiadau!) P'un bynnag, roedd y ffordd y cafodd y cwrs TILT ei gynnal yn helpu i hwyluso'r broses o ddychwelyd i'r byd dysgu. Roedd y tasgau wythnosol yn fy herio, a'r sesiynau bore Sadwrn yn hwylus iawn i rywun yn cyfieithu'n rhan-amser ar fy liwt fy hun.

Pa fudd fyddwch chi neu'ch cwmni yn ei gael o ddilyn y cwrs?

Cyn dilyn y cwrs TILT, doedd gen i ddim cymwysterau ffurfiol yn y maes cyfieithu, ac rydw i'n teimlo bod cwblhau'r cwrs yn fy ngwneud i'n fwy 'credadwy' fel cyfieithydd. Mae'r cwrs hefyd wedi cynyddu fy hyder, ac wedi rhoi'r cyfle i mi roi tro ar gyfieithu pob mathau o wahanol destunau. Cefais hefyd fy nghyflwyno i, a chael cyfle i ddefnyddio, meddalwedd cof cyfieithu 'Cyfieithu Cymru' (a gafodd ei greu yma yng Nghanolfan Bedwyr ym Mangor), rhywbeth nad oeddwn wedi ei wneud o'r blaen.

Sut glywsoch chi am gyrsiau TILT?

Roeddwn i wedi clywed am y prosiect TILT drwy Brifysgol Bangor ac yn gwybod ei fod yn ymwneud ag ieithoedd, ond doeddwn i wedi ymchwilio'n iawn i beth oedd o, na beth oedd yn ei gynnig. Roedd angen i mi fynd ar y wefan ar gyfer gwaith un diwrnod (dwi ddim yn gallu cofio pam!), a des i ar draws y cwrs cyfieithu, oedd yn swnio'n berffaith i mi. Felly cysylltais gyda staff y prosiect y diwrnod hwnnw a gofyn am ragor o wybodaeth a sut i gofrestru.

Pam y bu ichi benderfynu cymryd rhan yn y cynllun?

Roedd gen i ddiddordeb mewn dilyn cwrs a/neu gymhwyster cyfieithu pan wnes i gofrestru'n hunan-gyflogedig. Bues i'n holi Prifysgol Aberystwyth ynglŷn â'r Dystysgrif mewn Cyfieithu, ond yn anffodus nid oeddent yn siwr os oedd y cwrs yn mynd yn ei flaen. Yn eithaf buan ar ôl hynny des i ar draws y cwrs TILT. Roeddwn i'n teimlo bod y cwrs yn berffaith i mi ac yn fwy cyfleus gan na fuasai rhaid i mi deithio i Aberystwyth i fynychu rhai sesiynau. Roedd y cwrs TILT yn cynnig y cyfle i mi weithio ac astudio ar y cyd – bonws oedd y ffaith ei fod wedi ei ariannu'n llawn hefyd!.



Beth oedd y peth gorau am y cwrs y buoch chi arno?

Cefnogaeth ac arbenigedd y tiwtor, ac aelodau eraill Canolfan Bedwyr. Roedd hi'n braf cael dysgu mewn awyrgylch ble'r oedd cymorth ar gael yn hawdd, a hyblygrwydd ar gael os oedd ei angen arnoch. Weithiau roedd hi'n anodd gweithio'n llawn amser a chwblhau'r tasgau wythnosol (yn ogystal â threfnu priodas a chadw ar ben y gwaith tŷ a thasgau dydd-i-ddydd diflas eraill!), ond roedd staff y prosiect o hyd yn amyneddgar a chefnogol dros ben.

Yn eich barn chi, pa mor bwysig i'r economi yng Nghymru drwyddi draw yw cael cyrsiau wedi'u hariannu'n barod sy'n canolbwytio ar fusnesau?

Mae cwmnioedd ledled y wlad wedi bod drwy gyfnod ariannol anodd yn ddiweddar, ac mae'n debyg bod ganddyn nhw bethau pwysicach i wario eu pres arno na hyfforddiant. Rydym ni'n lwcus dros ben bod cyrsiau fel hyn, sydd wedi eu hariannu'n llwyr, ar gael wrth garreg ein drws, ac mae'n bwysig gwneud y mwyaf ohonyn nhw tra mae'r cyfle ar gael. Mae cyrsiau fel hyn yn amhrisiadwy..

Pa gyngor fyddai gennych chi i fusnesau neu weithwyr ar eu liwt eu hunain sy'n meddwl dilyn cyrsiau TILT?

Ewch amdani! Mae yna o hyd rhesymau i beidio gwneud rhywbeth; diffyg amser, pwysau gwaith, bywyd teuluol prysur. Ond mae rhaglen TILT yn cynnig cyfle prin i astudio ac ennill cymhwyster drwy weithio o amgylch y 'rhwystrau' hyn, a hynny wedi ei ariannu'n llawn hefyd. Mae'r rhaglen yn hyblyg ac mae digon o gymorth ar gael pan 'rydych chi ei angen o. Buaswn i'n argymhell y rhaglen i unrhyw un sy'n cyfieithu ac yn ymddiddori mewn iaith, p'un ai eu bod yn gweithio i gwmni neu ar liwt ei hun

Mae TILT yn rhan o'r Rhaglen Dysgu yn y Gweithle, a ariennir drwy Gronfa Gymdeithasol Cydgyfeiriant Ewrop yr UE drwy Lywodraeth Cymru. Os hoffwch gael mwy o wybodaeth am y cyrsiau eraill a gynigir gan y project, cysylltwch â s.ghazzali@bangor.ac.uk neu ewch ar wefan TILT <http://www.tiltcymru.org.uk/wordpress/bangor/>